



Cuira, ils 8 da november 2022

Communicaziun a las medias

Premi offert da la Lia Rumantscha e da la vischnanca da Zuoz: Selma Mahlkecht survegn l'emprim «premi travers zuoz»

L'emprim «premi travers zuoz» va a Selma Mahlkecht, autora e reschissura da Zernez, per ses toc da teater «Üna sbrinzla da spranza per S-chus-ch». Quest toc ha la giuria tschernì da las diesch inoltraziuns anonimisadas. Il toc da teater victur vegn realisà l'onn proxim durant l'emprima ediziun dal «festival travers zuoz». La surdada dal premi, che vegn offert da la Lia Rumantscha e da la vischnanca da Zuoz, ha lieu ils 19 da november 2022 en il Teater Zuoz Globe/Lyceum Alpinum Zuoz.

Diesch concepts ed extracts da text per cumedias autalpinas, thrillers, paraulas e melodramas famigliars en sursilvan, vallader, puter e rumantsch grischun èn vegnids inoltrads anonimamain per il «premi travers zuoz». La giuria – che sa cumpona dad Anna Serarda Campell (scienzada da teater), Sara Francesca Hermann (actura), Manfred Ferrari (reschissur e producent), Rico Valär (romanist) e Roman Weishaupt (directur dal Teater Cuira) – ha discutà las contribuziuns tenor criteris linguistics e dramaturgics ed ha prendì sut la marella la fermezza da las figuras ed il potenzial da realisabladad sin tribuna. La giuria ha constatà ina gronda veglia da scriver teater e bleras bunas ideas da cuntegn, dentant er anc potenzial pertutgant la visiun da la realisaziun teatrala contemporanea da las ideas.

L'emprim «premi travers zuoz», dotà cun 15'000 francs ed offert da la Lia Rumantscha e da la vischnanca da Zuoz, va a Selma Mahlkecht, autora e reschissura da Zernez, per ses toc da teater «Üna sbrinzla da spranza per S-chus-ch». En sia istorgia vulan investurs pauc transparents realisar in bunker da protecziun e survivenza cunter tut ils mals actuals sco la crisa dal clima, las guerras, la crisa d'energia, la differenza tranter ritg e pauper ed auter pli. Tut questa grandaschia vegn la fin chastiada da la natira cun ina sort bova à la Cengalo. Il plot n'è betg nunenconuscent, l'autura fa allusiuns biblicas e dürrenmattianas e tracta dumondas veglias che restan virulentas, dumondas globalas ch'èn a medem temp era specificamain rumantschas ed alpinas. Il concept inoltrà mussa tenor la giuria bler potenzial al nivel da l'idea e da la lingua, da la reflexiun satirica e critica e da las tematicas actualas. Persvadì han era la dramatisaziun ed ils dialogs concis e bain construids dal punct da vista dramaturgic.

Program da la surdada da premi

En preschientscha da represchentantas e represchentants da la Lia Rumantscha e da la vischnanca da Zuoz ha la surdada da l'emprim «premi travers zuoz» lieu sonda, ils 19 da november 2022, a las 16.00 en il Teater Zuoz Globe/Lyceum Alpinum Zuoz. Ella è dapli che mo ina surdada da premi: Annina Sedlacek e Jonathan Ferrari mussan ina performanza litterara ispirada da tut ils diesch texts e concepts inoltrads. Uschia renda il duo visibla la varietad e ritgezza da tut questas inoltraziuns. Asa Hendry e Leander Albin preschentan lur nova performanza teatrala. A las 19.00 dat Ursina Giger in concert cun ses trio.



Lia Rumantscha

surdada «premi travers zuoz»

19 da november 2022, 16.00

Teater Zuoz Globe/Lyceum Alpinum Zuoz

entrada libra, collecta

reservaziuns: zuozglobe@lyceum-alpinum.ch

Davart l'autura

Selma Mahlkecht è oriunda dal Vnuost e ha fatg suenter il gimnasi in studi da dramaturgia e scenari per film a Vienna. Ella ha scrit divers cudeschs e tocs da teater per giuvenils, dentant era per ensembles professionals en lingua tudestga. Selma Mahlkecht viva dapi diesch onns a Zernez e scriva, nua ch'ella ha emprendì rumantsch. Ella lavura sco autura independenta e preschenta regularmain avant Nadal in program d'art per la tribuna pitschna. «Üna sbrinzla da spranza per S-chus-ch» è ses emprim toc da teater rumantsch.